

## U' PATRI FRANCIA

*“Chista è a' casa du Patri Francia .  
Cu arriva si 'ssetta e mancia“ :*  
così dicivunu i poviri i' Missina  
chi no aviunu nenti 'i manciari.

Si surgivunu prestu ogni matina  
e annavunu unni u' Patruzzu a circari,  
sinnò muriunu 'i fami strati strati,  
comu tanti cani abbannunati.

U' povuru canonicu, mischineddu,  
in quattru si facia pi' risturarli  
e non mannavà arreti mai a nuddu  
e debiti facia pi' sfamarli.

Passava pe' i' vie e i' vineddi  
ca' manu stisa e cercava soddi :  
“Aiju tanti bucchi da ddubbari  
e centu picciriddi da jutari”.

Nni visti, ciaticeddu, facci e cori,  
insulti, parulazzi e puru mmoffi,  
ma iddu avia na fidi quantu u' mari  
e no si curava mancu di pitoffi.

Nu jionnu nu vecchiarreddu ci bussàu,  
avia fami e no vidia i' ll'occhi  
e era chinu chinu 'i pidocchi.  
Tuttu da testa e' pedi u' lavau  
e dopu chi ci desi da manciari  
u' binidiciu e in frunti u' baciavu.

U' povereddu si 'nnannavu cuntentu,  
giuiùsu caminannu lentu lentu,  
dicennu lungu a strata chi facia :  
“Biniditta 'a Vergini Maria !”.

E poi, comu s' u' Rusariu dicia,  
ripitia a postu 'i 'll'Avi Maria :  
*“Chista è a' casa du Patri Francia,  
cu arriva si 'ssetta e mancia“.*